

**Exercise: scenario**

December 17, 2019. Mga alas-kwatro na ng hapon. Kakauwi lang ng mag-anak sa bahay nila sa Bulacan mula sa oath-taking for psychometricians ni Jillian sa PICC at sa isang buffet sa Manila. Naupo silang tatlo sa sala at nilapag ni Jillian ang bouquet niya ng tulips na galing sa “hindi kilalang tao”, ayon sa Daddy niya. Tinanong ni Mario si Jillian kung may manliligaw siya, at umiling si Jillian. Sagot ni Mario, “dapat lang, dahil wala ka pang trabaho”. Napatingin na lang si Jillian sa sahig.

Nabanggit ni Mario ang tungkol sa masarap nilang tanghalian. Favorite niya raw yoong niluto niyang salmon, yoong ramen, at yoong avocado ice cream. Nakangiti lang si Jillian pero hindi siya nakatingin sa Daddy niya. May katext siya. Tinanong ng Daddy niya kung sino ang katext niya, at ang sabi ni Jillian “nag-register lang sa promo”.

Humingi ng kape si Mario kay Juliana. Tumayo ang hindi pa nagsasalita na Mommy ni Jillian at pumunta sa kusina. Habang inihahanda ni Juliana ang kape ng asawa, brining-up ni Mario sa usapan ang pangarap ni Jillian na mag-theater arts noong college sa UP Diliman. Sinabi niya sa anak, “tignan mo: kung nag-theater theater ka noon, wala kang lisensiya ngayon. Mabuting nag-psychology ka sa Ateneo. At mabuti nakakuha ka ng scholarship. Kahit na komportable tayo, mahal mag-aral doon. Hindi ba sosyal ang mga kaklase mo? ‘Wag kang tutulad sa kanila.”

Nakabalik na si Juliana na may dalang mug ng kape para kay Mario, dalawang baso, at pitsel ng orange juice para sa kanila ni Jillian. Patuloy lang na nagsalita si Mario tungkol sa teatro, sa mga kaklase ni Jillian, at sa magiging kinabukasan ni Jillian. Sinusubukang magsalita ni Juliana noong dumating siya sa sala, pero hindi siya makasingit.

Napag-usapan din ang pagno-nobyong ni Jillian. Sabi ni Mario, “bawal ka pa ring mag-boyfriend hangga’t wala kang trabaho. E magsisimula ka pa lang maghanap. E halos hindi ka nga nakapasa noon. Matatagalan kang makakuha ng trabaho.” Tumalak nang tumalak si Mario, sinubukan nang sinubukan ni Juliana na magsalita, at nanatiling tahimik si Jillian. Nang dahil sa inis, tumayo bigla si Jillian, nagmura, nag-walk out, at padabog na sinara ang pinto ng kanyang kuwarto.

Hinabol nang pagalit ni Mario si Jillian sa kanyang kuwarto at minura ito. Nakapagsalita na rin sa wakas si Juliana, dinipensahan si Jillian. Nagkaalitan at nagsagutan ang mag-asawa hanggang inirapan ni Mario si Juliana at pumasok sa kuwarto nila. Sinundan ni Juliana si Mario.

Narinig ni Jillian ang lahat ng nangyari sa sala. Lumabas sa sala si Jillian, dala ang kanyang cellphone. Tinawagan niya si Kristof (na *sana* ay nakaupo sa laylayan ng entablado). Kinuwento niya ang nangyaring alitan sa pagitan ng kaniyang mga magulang, at kung paano naging mahigpit ang Daddy niya sa kanila ng kanyang Mommy simula pa noong ipinanganak siya, hanggang noong college at after college. Nakuwento niya rin yoong katotohanan tungkol sa lokasyon niya noong nagtagpo sila sa dating app. Nakuwento niya rin na tila hindi niya ramdam na mahal siya ng Daddy niya, at parang hindi siya pinagtatanggol ng Mommy niya. Pero pilit niya pa ring kinuwento ang mga masasayang alaala niya kasama ng mga magulang niya, lalo na kasama ng Mommy niya.

Napatigil si Jillian nang may marinig siyang sigaw mula sa kuwarto ng mga magulang niya: sigaw ng Daddy niya ‘yon. Binaba ni Jillian ang telepono noong lumabas ng kuwarto ang Daddy niya at tuluyang lumabas ng bahay para pumunta sa bahay ng Ninong Mar ni Jillian. Tumawag siya ulit kay Kristof noong narinig niyang nag-lock ng pinto ang kanyang Mommy na nagsimulang umiyak. Nalaman niyang papunta si Kristof sa bahay nila sa Bulacan dahil hinihingi ni Kristof ang address nila.

Noong dumating si Kristof, niyakap niya ang nobyo, at umiyak si Jillian. Naupo sila sa sofa, at umiiyak pa rin si Jillian. Pinagtapat na niya kay Kristof na buntis siya. Naiyak sa tuwa si Kristof. Niyakap niya si Jillian. Inaya niya agad itong magpakasal. Umoo naman si Jillian, pero halata sa mukha ni Jillian na halo ng galak at pag-aalala ang nararamdaman niya. Sinabi niya kay Kristof na panahon na para ipakilala niya si Kristof sa pamilya niya dahil nga buntis na siya at may balak na silang magpakasal agad, kahit na takot siya sa puwedeng mangyari. Tinanong ni Kristof kung bakit mukhang dismayado si Jillian, at kinuwento niya ang “rule” ng Daddy niya tungkol sa pagnonobyong niya. Nasabi niya rin na madidismaya ang kanyang Daddy dahil sumuway siya sa rule, pero sana naman daw ay matanggap ng kanyang Mommy ang pangyayari. Ni-reassure ni Kristof si Jillian na kahit anong mangyari, patatagutan niya at hindi niya pakakawalan at pababayaan si Jillian.

Nagyakap at nag-iyakanan ang dalawa nang lumabas ng kuwarto si Juliana. Nagulat si Juliana sa nakita niya kaya nabitawan niya ang hawak niyang baso na wala namang laman at

nabasag ito sa sahig. Kumuha ng walis si Jillian. Naiwan sina Kristof at Juliana. Tinanong ng ina kung sino si Kristof, at sinabi ni Kristof ang totoo. Kalmado naman si Juliana. Inaya niyang umupo si Kristof sa sofa at nagsimula siyang magtanong kay Kristof tungkol sa kung saan siya nakatira, ano ang trabaho siya, kung ilang taon siya. Quezon City, freelance singer-songwriter pero regular na tumutugtog sa isang bar sa Quezon City din, at 39. Nakabalik na si Jillian na may dalang walis at dust pan at nagsimulang magwalis. Inulit ni Juliana ang edad ni Kristof, at medyo tumaas ang boses ni Juliana rito sa gulat. Kinumpirma nga ni Kristof na 39 taong gulang na siya nang kalmado, pero halata na simula na ng pagkakaba niya. Naramdaman ni Jillian ang tensiyon sa pagitan ng Mommy niya at ng boyfriend niya kaya tinigilan niya ang pagwawalis at umupo sa gitna nina Juliana at Kristof.

“Let me explain, Mommy” ang bungad ni Jillian sa Mommy niyang conservative. “Anak, bakit naman sobrang tanda sa’yo ng boyfriend mo? Baka akalain ng mga tao na sugar baby ka.” Kinuwento ni Jillian ang buod ang kuwento nila ni Kristof: na nagkakilala sila sa dating app isang buwan pa lang ang nakakalipas, at magpapakasal na sila. Nagalit lalo si Juliana. “Bakit naman kayo na agad? At kasal na agad?”

Pumasok si Mario sa bahay at nakita niya ang komprontasyong nagaganap. Tinanong niya nang mahinahon kung sino si Kristof, at sumagot nang pagalit si Juliana. Hindi naman nabigla masyado si Mario. Nagsimula nang manermon si Juliana tungkol sa nalaman niya, pero nakinig lang si Mario. Pagalit niyang sinabi kay Mario na 39 years old na ang boyfriend ni Jillian na nakilala niya sa isang dating app one month ago, at plano na nilang magpakasal. Mahinanong tinanong ni Mario si Jillian kung bakit sila magpapakasal agad, at ibinunyag ni Jillian na buntis siya, at balak niyang tumira sa apartment ni Kristof bago pa sila ikasal.

Nanigas at nablangko nang bahagya si Juliana sa gulat. Ngumiti si Mario at niyakap niya si Jillian, habang sinasabi ang “masaya ako para sa’yo anak”. Kinamayan rin ni Mario si Kristof, “congratulations, hijo. Welcome to the family”. Blangko pa rin ang mukha ni Juliana.

Masayang nagyakapan sina Mario, Jillian, at Kristof. Papunta sila sa hapag kainan nang tumayo sa pagkakaupo sa sofa si Juliana at hinawakan sa braso si Jillian at tinignan ito nang may matatalas na mga mata. “Ito ba’ng igaganti mo sa’kin? Pinalaki kita ng maayos. Tapos bababuyin mo ang imahe mo? Iningat-ingatan ko ‘yan. Tapos gaganyanin mo lang?”

Dinepensahan ni Jillian ang kanyang sarili. Tinanong niya ang Mommy niya kung ano ba ang imaheng iningatan niya, at kung kaninong imahe talaga ang iningatan niya. Sinumbat niya na never siyang pinagtanggol at pinaglaban ng Mommy niya sa Daddy niya, lalo na sa mga gusto niya sa buhay, kahit na alam na ng Mommy niya ang mga ito.

Sinumbatan na rin ni Juliana si Jillian na hindi niya rin ginawa ang parehong bagay para sa kanya kahit na nakukuwento na minsan ni Juliana sa kanyang anak ang mga pang-aabusong pisikal, emosyonal, and berbal ni Mario.

Sa puntong ito, sinusubukang kalmahin ni Mario si Juliana, pero dinamay ni Juliana si Mario sa galit niya. Sinumbat niya sa asawa ang lahat ng pang-aabuso at pagkukulong sa kanya. Sinumbat niya rin ang paghadlang ng asawa sa pangarap niyang maging makeup artist. Sinumbat niya rin na sa simula lang niya hinigpitan ang anak niya lalo na sa pagnonoby, pero tatanggapin niya rin pala ang digrasyada niyang anak.

Pinagpapawisan sa tabi ng sofa si Kristof, at napag-initan din siya ni Juliana. Pinagbintangan niya na ginayuma at ni-rape ni Kristof si Jillian. Susugurin na ni Juliana si Kristof, pero hinarangan ni Jillian si Kristof at sinigawan niya ang kanyang Mommy. "Sumosobra ka na!" sigaw ni Jillian.

"Sumasagot ka na? Bastos ka!" sagot ni Juliana. Sinampal niya ang anak niya. Pinapalayas na niya ang anak niya. Nagsagutan ang mag-ina. Inaawat na rin ni Kristof si Jillian. Sa galit ni Jillian, hinubad niya ang graduation gift ng Mommy niya sa kanya na kwintas na may pendant na heart na may naka-engrave na "smile" at itinaapon ito sa sahig at tinapakan. Sa galit, itinatakwil na rin ni Juliana si Jillian. Inaawat na ni Mario si Juliana sa puntong ito, pero hindi nananaig si Mario.

"Lumayas ka! Ayaw na kitang makita!"

Lumabas na ng bahay si Kristof. Pumasok ng kuwarto si Jillian, at lumabas ng kuwarto dala ang mga bag niya. Noong nagpaalam ang Daddy niya sa kanya, sabi ng Daddy niya "malaya ka na. I'm happy for you. Be happy." Tuluyang lumabas ng bahay si Jillian. Pumasok ng kuwarto nila si Juliana, at pumasok ng kuwarto ni Jillian si Mario.